



Chhuah tan kum
- 1970 -

KRISTIAN THALAI

Kristian Thalai Pawl
Chanchinbu
Thla tin chhuak



VOLUME XV

NO. 11

FEBRUARY

2025

ARTICLES

BE MY Valentine

UPA LALNUNPUIA HRAHSEL

KŦP LEH KALPHUNG NGHET - H. LALCHHUANAWMA
THUTAK THU FEL TAKA THENTU - DR. K. LALRUATFELA

SERMON

Chatuan Lungpui aw Krista- Rev. Lalhunthara

THALAITHE SUANGTUAHNA

Ŧrista a tel ve em? - T.C. Lalremsangi

ZIR BINGNA

Environment humhalh chungchang - Roma Hmar



SYNOD HOSPITAL CHARITY FUND HLAN (13.12.2024)



ZEMABAWK NORTH BR. KTP RUBY JUBILEE CONCERT (5.12.2024)



NGUR VENGSAK BRANCH KTP GOLDEN JUBILEE (8-9.1.2025)



SAIKHAMAKAWN BRANCH KTP GOLDEN JUBILEE (12.1.2025)

KRISTIAN THALAI PAWL CHANCHINBU THLA TIN CHHUAK

Chhuah tan kum : 1970 | Kum 55-na | Kuminah vawi 2-na | Chhuah tawh zat : 555

Editor : P. C. Lalthanmawia

Joint Editors :

H. Zosangliana
T. C. Lalhruaitluanga
Lalruatpuia
Lalduhawma Chhange
Lalremsiamia Khiange
Vanlalremliana

Manager : Agnes Lalrinzuali

A lak man :
Kum khatah : ₹ 100.00
Copy khat : ₹ 8.33

Thu chhuah tûr nei chuan Editor, Kristian Thalai hnenah thawn tûr a ni a; la thar duh chuan KTP Office-ah hriattirin a man pêk lâwk tur a ni.

Editor Mobile : 8014697370

Manager Mobile : 8787480280

E-Mail : kristianthalai1970@gmail.com
centralktp@gmail.com

KRISTIAN THALAI PAWL



Thupui

Rawngbawli tûra chhandam

Thupui inngahna

Ephesi 2:10 : Thil tha ti atân Krista Isuaah chuan siamawmin, ama kutchhuak kan ni si a, chu thil tha tih chu kan awmma tûrin Pathianin a buatsaih lâwk a ni.

Thil tumte

1. Isua Krista rinna leh amah anna kawnga thalaite hruai.
2. Kohran kut ke ni tura thalaite buatsaih.
3. Kohran hnathawh tihpuitlin.
4. Krista Chanchin Tha puan darh.

A CHHUNGA THU AWMTE

1. Editorial	2
2. Sermon: Chatuan Lungpui aw Krista – Rev. Lalhunthara	3
3. Thalaite suangtuahna: Krista a tel ve em? – T. C. Lalremsangi	7
4. Zir bingna: Environment humhalh chungchang – Romalsawma (Roma Hmar)	9
5. Article: KTP leh kalphung nghet – H. Lalchhuanawma	13
6. Article: Thutak thu fel taka thentu: – Dr. K. Lalruatfela ...	15
7. Article: Be My Valentine – Upa Lalnunpuia Hrahsel	17
8. KTP Rorel Inkhawm Programme	22
9. Lamtluang: KTP tobul	24
10. Thalai huang: In	26
11. Hruaitute chanchin: (1) David Lalfakawma, C/M	27
(2) Lalrinsanga Varte, C/M	28
12. Hringlang Tlâng	29
13. Kantu: N. Chhimluang Branch	30
14. Keimahni	31

COVER DESIGN

SAMUEL VANLALPEKA, KHATLA EAST BRANCH

DAM CHHUNG NI



Los Angeles khawpuia University of California hmuna kum upa tawhte natna zir chianga buaipuitu ‘Gerontology Research Group’ ten an sawi dânin an hriat theih chinah khawvêlah hian kum 110 chung lam mi 91 chauh an awm a ni. An zir chian lai hian hmeichhia 82 an ni a, mipa 9 an ni thung. Khawvêla kum upa ber chu Portugal mi Maria de Jesus-i a ni thîn a, January 2, 2009-ah khân a thi a ni. Kum 1893-ah a piang a, kum 115 nia hriat a ni a, fa 6 neiin tu 11 a nei a, tuchhuan 16 bâkah a fate tu leh chhawng 5 a hmu hman bawk a ni.

Hemi hnuah hian Los Angeles khawpuia awm Gertrude Baines-i a ni a. September 11, 2009-ah khân a thi a, kum 114 a upa a ni a, sal fanu a ni nghe nghe. Tuna khawvela damlai zinga upa ber chu Inah Canabarro Lucas, Brazil ram a mi a ni a, kum 1908-ah a piang a, tunah hian kum 116 mi a ni mek a ni. Khawvêla dam zinga upa ber pawh kum 116 mi a ni a, record hrang hrang en pawhin kum 130 dam thleng hi hring fate zingah an awm hriat a la ni lo.

Mihring dam chhùng hi chu a va rei lo êm! Kan thạt lai kan chen theih chhùngte chu a rei lo êm êm mai a. Mahse, sual buma awmten nawmchen nân hman an tum thîn. A tâwpah erawh lungngaihna an chungah a lo thleng a. Beidawna bâk an hmu lo. Thlarau mi erawh chuan a dam chhùng hunte chu Lalpa tân a hmang ral a, hlim takin Lalpa nen an nun an hmang ral thîn. Dam chhung ni kan chhiar thiam leh thiam lohah hian kan nun pumpui thlamuanna, hlimna leh malsawma thlengin a inngat a ni. Pathian thua kan hmuh angin, “Kan dam chhng nite chhiar dan tur mi zirtir ang che, finna thinslung kan neih phah hialna turin” (Sam 90:12) tih hre reng chungin; Kristian Thalai vanglai nun hmang mekte hian kan dam chhung ni chhiar i thiam zel ang u.

T.C. Lalhruaitluanga
Jt. Editor

CHATUAN LUNGPUI AW KRISTA



Sermon



Rev. Lalhunthara

1. Innghahna tur zawng vek kan ni:

Mi tin hian innghahna kan zawng a; kan zawn chhan chu **him** kan duh vang a ni. Yuval Noah Harari chuan a lehkhahu *Sapiens: A Brief History of Humankind*-ah ‘ramhnuai leh hmun remchanga mihring hmasaten ei tur an dap khawm hnuin, lo neih leh khaw din an uar ‘tan a’ tiin a ziak a, **him duh vanga hetiang awm ta** niin Harari chuan a khaikhawm. Hmanraw hrang hrang te, hausakna leh thiltihtheihna te, damdawi lama inenkawlna ‘tha tak tak te hian **himna kan zawng** tih a tar lang a, **innghahna** kan zawng a ni.

Innghahna nghet zawng ‘thin mihringte hian sum, thiamna, thiltihtheihna, hriselna leh ‘tha nia kan hriatte chu kan dap ruai ruai a. Chawlh tuma ‘tan late chu chawl hleithei lovin min siam ang lawi a! Pastor Timothy Keller-a chuan a lehkhahu *Counterfeit Gods*-ah heng thil nihna hi fiah takin hetiang hian a ziak a, “*I thiamnaa i innghah chuan a derthawng tih i hre nghal dawn nia; I hna leh i thiamna chu i hloh thei. Inlaichinna hrang hranga innghah i tum chuan himin inggai suh; mihring chu kan danglam thut ‘thin a nia. Innghahna ‘tha ber leh him ber chu LALPA hi a ni,*” tiin a ziak.

A hausa leh thiltitheih apiang hian himna hi kan zawng nasa emaw tih turin khawvela mi pawimawhte hian himna leh innghahna an dap a. North Korea Supreme Leader, Kim Jong-un hi Supreme Guard Command hovin an veng a, amah leh a chhungkuate hi mi 100,000 velin an vil reng! *The Hindu* (9th Dec, 2024) a chhuak chuan, Meta hotupa Mark Zuckerberg-a him nan hian kum khatah India pawisaa nuai sing hnih chuang an sen thu a tar lang a; Google CEO, Sundar Pichai him nan hian nuai sang nga chuang; Amazon hotupa, Jeff Bezos him nan nuai sang hnih an seng.

Mi tin hian inngahna kan zawng vek a, kan zawn dan erawh a inang vek lo. Hausa aṅanga rethei, hrisel aṅanga bawrhsawm thlengin inngahna leh himna kan zawng vek a ni.

2. Isuan inngahna kan zawng tih a hria:

Him leh inngahna zawnga van ruai ṭhin mihringte dinhmun hre Chiangtu Isua khan **Jn 14:27**-ah ‘*ama thlamuanna*’ min hnutchhiah thu a sawi a. Isua min pek thlamuanna chuan *thinlung manganna* leh *hlauhna* ata himna leh tlan chhuahna min siamsak dawn a ni. Thlamuanna nei lo nun chunung reng chung a hrehawm tuarna niin Isuan a sawi a (**Jn 16:33**); he nun pawh hi Isuan min hnehsak theih thu a sawi a ni.

Chuvangin, ringtu thlamuanna leh himna chu a hun tawn fuh leh, a chet ṭhat lamah a inngat lo a, Isua Kristaah a inngat zawk a. Isua Krista chu nimin, vawin leh kumkhua pawhin a pangngai fo a (**Heb 13:8**). A pangngai tih hian a nihna leh chakna a hloh ve ngai lohzia a tar lang a ni. Chuvangin, Isua Krista chu **Chatuan Lungpui nghet** a ni.

Krista chu ringtute inngahna a ni, kan tih hian **van khua leh tui nihna thar pekin kan awm a** (Eph 2:19), amah chu a kila lung pawimawh a ni nghal bawkw (Eph 2:20). Paula hunlai khan in ropui tak tak an sa ṭhin a; a kila lung an dah hmang hian in sak hawi leh her lam (*angle*) an teh a, a kila lung hun dan a dik chuan a chung a hmanraw hrang hrang hmangin in ṭha leh rin tlak an sa ṭhin. A kila lung chu hawi leh her lam an siam fuh loh chuan hmanraw ṭha pui pui hmang mah se, in chu a nih ang a ni thei lo ṭhin.

Lal Isua hi inngahna atana kan hman loh chuan kan talent ṭha tak tak te, sum leh pai, thiamna leh finna, thiltihtheihna leh tawn hriat te pawh hi awmze nei lovin kan seng ral ṭhin. Isuaa kan inngah erawh chuan kan theihna beitham takte chu tihpunin a awm a, Isua zarah kan mawi a, ringtu nun ziktluak leh rah ṭha chhuah ṭhin chu keimahni aṅangin a lo chhuak ṭhin.

Chuvangin, **lungpui nghet Krista** hi kan chan ṭhat lai leh hniam ber lai te, mi rethei leh Hausa te tan, mi hrisel leh bawrhsawmte tan, rinna kawnga bul ṭante leh tawn hriat nei ṭhate

tan pawh inngahna tlak a ni a. Amaha inngat apiangte chuan nun ziktluak leh, mihringin a zawn *thlamuanna leh himna* chu an chhar ðhin.

3. Inngahna dang zawng erawh kan tam hle si:

Eden huan aţanga Pathian thutak zawm lova *independent* khel ngar ngar mihringte hian Lalpa ni lo chiah chiaha inngahna dang zawn hi kan chak tlat zel a. Sualin kan chhia leh ða hriatna a fan chhuah hnu phei chuan belh tur dik Lalpa pan si lovin, belh tlak loh thilsiam dangte kan um kan um a. Lalpan khawvel chaknaa inngat lova amaha inngat tura min fuih laiin (**Sam 20:7**), amah rin chhan lo nun, anchhe dawng lamtluang (**Jer 5-7**) kan zawh lui fat fat a.

Chan chhiat ber laia Ruthi'n Lalpa thla hnuai a chuh tlat ang kha (**Ruthi 2:12**) kan vang tial tial a; lal Ahaza (**2 Lalte 16:7-9**), lal Jehoiakima (**2 Kings 23:35; Jeremiah 22:13-19**), lal Zedekia (**Jeremiah 37:5-10**) ten Lalpa thua inngat lova, an hriatna leh khawvel lalram dangtea an inngat ang main tunlai khawvelah hian *Chatuan lungpui nghet Krista* hi kan thlahthlam zel niin a lang. A

tawpah kan nunin a tuar a, chawl duh si, chawl thei si lovin kan van ruai ruai a. Him duh si, him tak tak si lovin kan khur ru fo ðhin.

India rama 'mi fîng' kan tihte zing a mi, MP ni bawk, Shashi Tharoor-a chuan, "*Khawvel hma hun hi ðhalaite kuta awm a ni,*" tiin a sawi a. ðhalaite rilru sukthlek hi khawvel chuan a ngai pawimawh zel ðan niin a lang. Chutiang taka theihna leh mawhphurhna sang tak kan neihna khawvelah hian inngahna nghet kan neih loh chuan *lehkhachaih mawi tak, a chaihna hrui chat* ang lek kan ni thei. Isuaa inngat chung a ðatlai leh vanglai chente pawh hi vanduaina leh harsatnain min um pha ve dawn tho. Mahse, kan inngahna lungpui Krista a nih chhung chuan ngingh ve dawt dawt ðhin mah ila, tlu chhe lo turin Lalpan min pui dawn a ni.

4. Chatuan lungpui Kristaah chuan engtin nge kan inngah ang?

A thu zawmin. Ni e... Krista thu zawm hi inngah dan tur chu a ni. Isuan ngeiin, "*Chutichuan, mi tin hêng ka thu hi hriaa zâwm apiang chu, mi fîng, lungpui chung a in satu nèn tehkhin tûr a ni. Ruahte a lo*

sûr a, tuite a lo lian a, thlite a lo tleh a, chu in chu a rawn nam sawk sawk a; nimahsela, a chim lo va; lungpui chung a rem tlat a nih avângin,” (Matt 7:24-25) a ti a ni. Isua thu hriat a, zawm hi kan tan a ðha mai ni lovin, a him a, inngahna tlak khawpa tlo leh nghet a ni.

Kum 1940 chhovah khan America ramah Pathian thu hritlu lar thar pahnih an awm a, chungte chu Billy Graham leh Charles Templeton-a te an ni. Inkawm ngeih tak leh, rawngbawl dun an ni a, a phur pawh an phur. Mahse, Templeton-a zawk hian Bible thuneiha a ringhlel ðan ta a, khawvel thiamna leh finnaah a rinna a nghah nasat tial tial hnu phei chuan Kristian rinna a thlah thla ta a ni. Billy Graham-a pawh a rilru a buai hle a, kum 1949-a Forest Home retreat center, California-a a retreat phei chuan khawvel finna inngah a duh ve rum rum thu a sawi a ni.


Mahse, Billy Graham-a chuan a finna leh hriatna aiin Pathiana inngah a thlang ta a. Rawng a bawl chho a, a

inngahna chu Bible a ni. Lalpan a hmang ta a; mi thiamten an chhut danin Billy Graham-a rawngbawl na kha a hmunah mi maktaduai 215 velin an chhim a, ram hrang hrang 180 chuanga rawng a bawl a ni. A ðhianpa, Charles Templeton-a erawh chuan khawhar takin a lei nun a hmang ral thung a ni.

Tunlai khawvelah hian ðhalaite tan inngahna tur a tam tawh hle. Thlan sual a pawh a, thlan fuh erawh chuan hringnun thawnthu ngaihnawm tak ziah theihna a ni thung. Thlan tur tam tak Lalpan min chhawpsak ve lo a. Isua chu thlang a, a thu zawm zel hi **Chatuan lungpui Kristaa inngah dan** chu a ni mai a. Sawia awlsam, a taka zawm dawna tluang purh ni si lo hi kan thlan a ngai a. Thlarau Thianghlimin min pui zel ang a (**Jn 14:26; 1 Kor 2:10-12**), Kristaa inngah hlawkzia leh lawmawmzia te, dam chhan dik tak nei chung a nun hlutna te kan chhar thar ang.

Lalpan a thu malsawm rawh se. Amen ●

KRISTA A TEL VE EM?



NI. T.C. Lalremsangi, Maite Branch

Tunlai boruak thlir chuan kawng engkimah tel ve, lang ve, mi hriat ve nih chakna a tam hle mai. Tute emaw zinga awm ve, an tih ang tih ve, an hmuh leh hriat ang hre ve nih tumin kan phe suau suau a ni ber e. Kan zingah, kan nunah tu nge tel ve se kan tih thin? Mihring chu kan thil tih zeuh zeuh atang ni lovin, kan tih than atangin kan mizia a lang thin a. Dawhtheihna, ngilneihna, hmangaihna, thuhnairawlhna leh insumtheihna te hian Krista nun a puang chhuak a, kan nunin eng thil nge a puan chhuah ve le?

Hnathawh leh nunphung inang lo mah se, Kristian kan nihna hian min la phuar khawm tha viau a. Eng emaw chenah nunphung a la nuam viau. Amaherawhchu, Kristian ram ni si, Krista zuitu inti theuh theuh, kan sukthlek a danglam chho zel a, kum 2020 hma lam (covid-19 kan hmelhriat hma) leh a hnu lama social media-a kan inpho lan duh dan pawh a danglam hle mai. Vantlang titiah chuan “lockdown effect” an ti awl lova, a dik thei hial awm e. Eng pawh ni se, Krista zuitu tih atana awm reng a ni em? inzawt thin ang u. Nun hi thiam a har a, thiam tur pawhin eng nge dik ber hriat a

har thin. Khawvel mi ropui kan ngaihsan tak takte pawh hi nun dan an thiam loh avanga pai chawn chawn changte, thinlung nat avanga mittui far fap fap khawpa an nat chang a awm. Amaherawhchu, tichaktu, fuihtu an hmuh fuh avangin harsatnate chu hnehin an chanchin tingaihnaawmtu a lo ni zawk thin, min tichaktu, lungpui nghet KRISTA kan vawn ngheh a pawimawh hle.

Chhungkaw keh chhia (broken family) avanga ruihhlo bawiha tang mek te, tunlai thalaite zinga hluar em em depression, suicide (mahni intihlumna) tam takte hi kan

chawrchhuahna chhungkaw lungphum a fuh tawk loh vangte a ni chawk. Krista nen chhungkua din ila, Krista nen nun hmanng ila, heng buaina tam tak hi a pumpelth theih ngei ang. Krista tel vena chhungkua chuan nun awhawm, nun tak a chherchhuak thin si a. Ram leh khawtlang nuam neih kan duh theuh ang a, keini Kristian rama cheng Kristiante hian

eng chena thui nge Krista kan zui ve? Tuna Mizoram dinhmun kan thlir chuan India ramah HIV/AIDS tamna ber pawl kan ni ta mai hi a lungawithlak loh tak zet a, thu inhmeh lo tak a ni. Insumtheihna kan mamawh hle niin a lang.

Galatia 5:22-23-ah chuan “Thlarau rah erawh chu hmangaihna te, hlimna te, remna te, dawhtheihna te, ngilneihna te, thatna te, rinawmna te, thuhnuairawlhna te, insumtheihna te a ni zawk e” tih kan hmu a. Thlarau ațanga

chhuak nun tak, pawn lam lan dan piah lam, chhung rila Krista vuantu, a lairil bera Krista neitu kan nih a va han pawimawh em.

Kan thil tih, kan țawngka chhuak, mi dang chungka kan rilru put hmanngte hian Krista nun a

Kan thil tih, kan țawngka chhuak, mi dang chungka kan rilru put hmanngte hian Krista nun a pho lang pha thin em tih kan inzawh fo a țul.

pho lang pha thin em tih kan inzawh fo a țul. Krista nun țawmtute chuan mahni an inhneh tihna, mahni inhnehte nun chu an awhawm fo a, an nunah Lal Isua Krista

a lang thin, chu chuan Krista panna leilawn pawimawh tak a lo dawh reng a ni.

Nun lairil bera Krista neitute chuan mi dangte chhuhsak theih loh nun nghet, nun tak, chatuana nunna an neih tawh avangin harsatna leh lungngaihntaten an hneh ve tawh lo a, harsatna leh lungngaihna te chu Krista zarah an hneh tawh zawk thin.

Tuifinriat kama țiau vut tam tak zinga lungghlu hmuh fuh hlutzia an sawi aia hlu zawk, Krista tel vena nun neitu lo ni mawlh ang che ●

ENVIRONMENT

HUMHALH CHUNGCHANG

ZIR BINGNA



Romalsawma (Rom-a Hmar)

Ahmasain Kristian Ṭhalaite kan Lalpa Isua Krista hmingin chibai ka buk a che u. Khawvela kan awm chhungin mawhphurhna hrang hrang pek kan ni a. Marka 16:15-ah chuan “Khawvel zawng zawngah kal ula, thilsiam zawng zawng hnenah chuan Chanchin Ṭha hi hril rawh u” a ti a. Mihringte hnenah chauh ni lo Chanchin Ṭha hi hril turin min ti a ni. Hei hian thing leh mau, nungcha, kan chenna leilung, tlang sang tak takte leh ruam thuk tak tak te hi a huam vek a ni tih kan hriat a hun ta hle mai. Khawvel leh a chhunga thil awm zawng zawng siamtu chu Pathian a ni si a, Mita kan hmuh tham loh khawpa te pawh siamtu chu Pathian tho a ni si. Pathian kan zahna leh kan ṭihna hian heng te hi thleng pha ve tawh se ka van duh tehlul em.

Pathianin khawvela a dah, awm ve tura a tihte hian ṭangkaina leh hlutna, anmahni zawn ṭheuha pawimawhna an nei vek a. Hei hi mihring te hian kan ngaihtuah thlen fo a ṭul khawp mai. Keini chuan kan huat zawng te, mawi kan tih loh deuh te, kan rap zawng te hi he khawvelah hian awm ve lo se kan duh mai ṭhin. Chung mitechu han chhui thuk deuh ila, Kohran leh K|P, | halai pawl eng emawah mi ṭangkai takte an lo ni leh tho si a. A chang hi chuan kan pi antharna hian Biak In leh a chhehvel bak hi a pel ta lo

emaw tih mai tur hian kan awm ṭhinin ka hria. Hawh u, thilsiam dangte hi a siamtu Pathian vang chauh tal pawh hian i ngaithei ve teh ang u. Khawvela awm ve tura siamtu hi kan Pathian tho a ni si a. Enga tinge kan huat a, kan ngaihtheih loh em em mai le! An hnena Chanchin Ṭha hritlu tur kan nih kha i hre reng ang u.

Nungcha hrang hrangte hi Pathianin an chenna hmun tur te, an ei tur te thlengin a ruatsak vek a. Nangin sava lam i ei ang a, nangin sazu, nangin sangha, nangin rul etc. An chenna hmun turah pawh ‘Nang, tuipuzawl

aṅanga metre 700 hnuai lamah, nang chu tui puizawl aṅanga metre 1000 bawrah tiin rem a ruat fel em em a. Thu an awih em em bawk. An awm mai ṭhin, an phunnawi ve ngai hauh lo. Heng Pathian remruat hi tu nge ti khawlo a, tibuai zo ta le? Nungchateah hian Pathian thu awih lova han awm khawlo ta viau tu nge hriat kan neih le?

Ram ngawte kan ṭhiat a, khawlum te a zual zel a. Nungcha, tui puizawl aṅanga metre 700 hnuai lama awm tura a tihte tan khan damkhawchhuah a har em em tawh a. Hmun sang lam an rawn pan ve leh ta a. Lui ni se kan ti ṭawp em



em a, kan duh loh tinreng vawm luh nan kan hman a ni ber a. Lui dunga inthlahpung chi uchang kan tihte pawh khawchhunga kan tui dahna leh insak laia tui ṭlingah an rawn insawn ta sup sup a. Aizawl khaw chhung veng hrang hrang aṅang hian uchang thlalak hrang hrang hi min rawn thawn a, min rawn zawt ṭhin a. Chu chuan eng nge mihringteah harsatna a thlen? Aw le,

nungchate hi inei tawn an ni a, an inei tawnna khawvel tih buai loh leh an chenna hmun tih bawrhban loh hi humhalh dan ṭha ber a ni mai. Va duat tum chiam a, han khawi velte kha humhalhna a ni lo.

Kan lui leh kawrte kan tih ṭawp luat vanga khaw chhunga uchang an lo insawn chuan anmahni eitute khaw chhungah an lo lut ve nghal ṭhin tih hi kan hriat chian a ngai tak zet a ni. Nungchate chuan buaina dang

vak an nei lo, ei tur zawn, an inthlah pun hunah an inthlah pung leh ṭawp a, an tawm bo hunah fel fai takin an tawm bo leh mai ṭhin. Kum thar a lo

inher chhuak a, hetiang bawk hian an nihphung an rawn hlen chhuak leh ṭawp ṭhin a ni. Chuvang chuan a buai ber chu mihringte kan ni zel dawn.

Sazu ei tura a tihte chuan an dam chhungin an ei mai ṭhin. Sava ei tura a tihte pawhin an dam chhungin sava an ei mai. ‘Lalpa, Sava sa hi ka hne deuh ṭlat mai, tun tum chu vawksa leh bawngsa kan ei ve teh ang’

pawh an ti ngai lo. Hei tak hi mihring ni lo, nungcha dangte pawimawhna a ni bawk. An awm ve tawp hian an tih tur an ti ngar ngar thin. An inei tawwna khawvela mihringte kan inrawlh ve thin hian anmahniah harsatna tam tak kan thlen thin a ni. Rannung, ramsa eng emaw i ngei leh huat deuh te, i rap zawng takte i lo thah vak vak khan a n m a h n i a h harsatna tam tak i thlen tihna a ni a, chu chu



mihringteah a lo let leh thin. Rul i thah tam lutuk chuan sazu an pung ang. Engvangin? Sazu eiraltu tur an tlem sawt vangin. Chutiang zel chuan kan ngaihtuahna kan sen a ngai a ni.

Kan naupan ve deuh laite kha chuan vansang taka mu (Eagle) thlifim dawnga han dir ngar ngartepawh hmuh tur an tam thin; tunah erawh an awm ta lo! In lo ngaihtuah ve thin tawh em? Nangnin inla hmu thin em le? Mu lam chite hian sazu, laiking, sava dangte leh mi tam zawkin kan hlauha kan huatrawn em em rulte kha an ei ral nasa asin le! Lo ngaihtuah zawm ve chhin la, eng ramsa nge lo pung dawn le?

Mizoramah hian kum tin (Kum 10 chhunga chhinchhiah) mai Rulngan feet 10 vel bawra lian hi 10 aia tam mah that ziah ang kan ni a. Chu chuan eng nge nghawng a neih le? Tawitea sawi leh hram kan tum ang e. Rulngante hi rul dang ei ral tura Pathian siam an ni a, ramsa dang an ei ve meuh lo, rul hi an chawpui ber a ni. Rulngan puitling (ft 10 bawr) hian kum k h a t a h Chawngkawr

puitling hi 20 vel bawra ei hman thin a. Aizawl khaw chhunga Rescue call kan dawn hmem ber chu Chawngkawr, (Monocled Cobra) tur chak em em mai kha an ni a. Kum 2022 khan rul vanga harsatna tawkten vawi 209 min ko va, vawi 203 hi Aizawl khaw chhungah a ni a, vawi 183 hi Chawngkawr vanga kohna ka dawn a ni. Heng kohna kan dawn a tang hian Chawngkawr 19 chauh kan mansak thei a. In va man tlem ve? in lo ti a ni thei. Heng Chawngkawrte hian sazu kua an luah ve mai thin a, lung rem kaw karah te an tawm ve mai thin a, chutiangah chuan keini mihringte tan va luh theih ngaihna

a awm lo a ni. A luh chhuah theitu chu Rulngan, anmahni ei ral tur atana Pathianin a ruat ngei kha an ni si a. Hengahte hian enga tinge Pathian thilsiam dangte hi kan huat a, kan dem tlat ñhin mai le? A ti dik lo hmasatu zawk chu mihringte kan ni zawk si a. Airgun ñha pui pui kan lei a, thing nget ei raltu kan savate kan suat chum chum a, tur hmangin kan lui kan hrai awl lo va, h n a w m tinreng kan vawm lut a, kan lui leh khaw chhung kawrte chu bawlhhlawh bawmah kan hmang a, kan 'Ek' bawmah kan hmang fur hlawm bawk a nih hi. Veng hrang hrang ka fanna ah Kohhrana rawngbawltu leh Sawkar hnathawk Officer lian tak takte pawhin soakpit an nei lo fur mai nia mawle! Kan environment hi keimahni tihchhiat a ni e. Hawh u, i siam ñha leh teh ang u. A siamtu Pathian kan zahna leh kan ñihna avang ringawt pawhin hei hi chu kan bat a ni. Kan luite pawh a chhawrtu ber chu mi harsa zawkte an ni asin, lui dungah ei an zawng a



nia. I hnawm tinreng vawm luh nan hmang tawh lo hram teh khai. Lui dunga cheng nungchate siamtu Pathian pawh hi zah ve deuh tawh teh! I leivung paihte khan lui dunga balu laa ei zawngte, lui dung nungcha hmanga chhungkaw chawm te tan harsatna a thlen nasa asin. Kohhran biak in sakna vungte pawh kan paih awl lo va,

Inhmangaih t a w n n a ngawt lo chu ba kan neih a phal lo asin! Inhmangaih tawnnate chu kan va hlat em. Mi tana

harsatna kan thlennate hi kan ngaihtuah duh lo va, mi harsa zawkte tan phurrit kan siam nasatziate hi i ngaihtuah thleng ve teh ang u.

Environment chungchangah hian kan pianthar a ngai tak zet a, khawvel hmasawanna leh kan environment inbuk tawk taka kal tir theitu chu mihringte chauh kan ni si a. Nang leh kei chuan lui dungah hian ei kan zawng ve kher lo maithei. Mahse, i mihringpui, lui dung mamawh em emtu tam tak an awm a nia ●

KṚP LEH

KALPHUNG NGHET



Article

H. Lalchhuanawma, Armed Veng North Branch



KṚP hi Kohhran hnuaiia p̄awl pakhat a nih av̄angin Kohhran n̄en hian sawi hran theih loh, lâk hran theih loh, inzawm tlat a ni a; chuv̄angin, Kohhran kalphung hi KṚP kalphung t̄ur a ni a, Kohhran ror̄êl p̄êlin thil tum dang leh ngaih dân hrang a lo neih ve a thiang lo a ni.

Kohhran chu Krista thisena din, Pathian Thlarau ch̄enna t̄ura Thlarau Thianghlimin Isua Kristaa a rem kh̄awm, Pathian mite an ni a, Krista taksa an ni. Chuv̄angin, Kohhran hi a zahawmin a zah tl̄ak a, a ropui bawk. Khawv̄el p̄awl dang ang mai mai a ni lo va, huang khata dah ch̄i a ni hek lo. A chungnung larh a ni. Ch̄u Kohhran ropui tak kal z̄êl hnuaiia p̄eng pakhat chu KṚP hi a lo ni ta a, kan lo chhuahna bul hre rengin kalphung fel tak neiin KṚP-ah hian rawng kan b̄awl t̄ur a ni.

Kohhran kalphung nghet tak KṚP-te'n kan chhawm nun t̄ur thil pathum lo t̄ar lang ila -

1. Puith̄una: Kohhran ding t̄ur khan puith̄una hi a nḡai pawimawh êm êm a. Uanthuanna leh hohnate'n hmun an chang nḡai lo. Ch̄u an puith̄una chu t̄un thlengin Kohhran pawhin kan la zui ve ta z̄êl a ni. Kohhran puith̄una leh urhs̄unnate hi KṚP pawhin kan z̄awm ve z̄êl t̄ur a ni

a. Kan duh dân d̄ana inkh̄awm kalphung lo her danglam ve ngawt te, Pathian thu tak kalsan lutuka hlimhlawpna lam ringawt lo buaipute hi kan tih loh tawp t̄ur a ni. T̄unlai khawv̄el changk̄ang z̄êlah mi thenkhatte'n KṚP huang chh̄ungah entertainment lam thil tam tak seng luh an duhna a lian s̄awt hle a, h̄eng thilte hi tih loh tawp tur tihna ni lovin a thlit f̄im dân tâwk kan thiam t̄ur a ni. Chuti a nih loh chuan KṚP active member, Kohhran puith̄una hre thiam lo kan pung thur thur thei. Min hringtu Kohhran puith̄una huang p̄el lutuka hlimhlawpna thil buaipui hi KṚP te'n kan tih loh t̄ur a ni. Member hl̄ate hn̄uh hn̄aih n̄an h̄eng entertainment lam thilte hi hmathehah kan hmang t̄ur a ni hek lova, Isua Krista chauh hi kan hmachhuan ber t̄ur a ni.

2. Zahawmna: Kohhran hi a dintu a zahawm a, a din dân a zah tl̄ak bawk. Kohhrana rawngb̄awltu t̄ur pawh kan

Pathian hian a duh uluk hle mai a, Kohhran ding tira kohhran enkawltu tur Upa pasarih an thlan chhuahte kha thlarau leh fina khat, mi hming thate an ni. I Timothea 3:8- ah chuan, “Kohhranho rawngbâwtute chu mi zahawm an ni tûr a ni,” tih kan hmu. Chuvângin, KṚP hruaitute chu an zahawm tûr a ni a, mi uangthuang leh tawng tam lutukte an nih a rem lo va, Pathian Thlaraua khat, mi nun dik leh thianghlim an ni zâwk tûr a ni. Kohhran chu ‘Pathian Nung’ chênna, sual hua leh ngai thei lo ‘Pathian Nung’ kohhran a nih miau avangin a hnuaiapâwl ropui tak KṚP pawhin sual a ngaizam mai mai tur a ni lo va, sual langsar tak pawh do ngam lo khawpa KṚP chu sualin a chenchilh tawh chuan a zahawmna a hloh tihna a ni ang. Chuvangin sual lakah pawh Kohhran zahawmna kan humhim tlat tur a ni. Kan Biak In leh a chhehvêl pawh hi kan zah tûr a ni a, khawvêl lam thil sawia titi nân leh zûk leh hmuam tih nân kan hmang mai mai tûr a ni lo. Inkhâwm tûra Biak Ina kan lûtte hi kan kal satliah mai mai tûr a ni lo va, zahawm takin, fel fai takin kan lût thîn tûr a ni. Kan biak Pathian a zahawm si a.

3. Nghehna: Kohhran thianghlimna leh ropuina hre miah lo, khawvêl thiamna lama intihre tak tak, Kohhran sawisêl ngam leh Kohhran hnûaia pâwl ropui

tak KṚP pawh engah mah ngai lo mi tam tak an lo chhuak ta. Hêng mite avâng hian kan nghêng tûr a ni lo va, kan kalphung nghet ropui tak hi kan her danglam pah tûr a ni hek lo. Thil danglam thar rawn chîn chhuah tum, Kohhran huang pêla rawngbâwl chîng, tha ve âwm taka lang, belhchian tlâk si loh pâwl tam tak an lo chhuak tawh a, an lo la chhuak zêl bawkan ang. Hêng mite hian Krista chu lû-ah an neih loh avângin rei an daih ngai lo va, khawi hmunah mah lungawina tak tak an hmu ngai chuang lo. Rei lotêah an ral leh mai thîn. Kan zui Krista he khawvêla a len lai khân kalphung thar apiang a bawh huam huam lo va, kalphung nghet tak neiin a hna a hlen mai a ni. Keini Kristian Thalai Pawl pawh hian kan Lal Isua hnung zuiin kalphung nghet tak kan neih hi vawng nung reng ila, kalphung thar apiang bawh mai lovin kan thawh tûra Lalpa min pêk Chanchin Tha hril hna hi âm takin i thawk mai ang u.

Engtik niah emaw chuan kan khawvel hun leh nun inher danglam zel mila kan rawngbawl dan pawh kan her danglam hret hret a tûl hun chu a la awm ngei ang tih chu rinhlelh rual a awm lo. Chutiang ang hun a lo thlen pawhin kan kohhran lungphum hre reng ila, kohhran puithuna, zahawmna leh nghehna sâwi danglam lo zâwnga kan inher rem thiam pawh a tûl hle áwm e ●

THUTAK THU FEL TAKA THENTU



Dr. K. Lalruatfela, Bethlehem Branch

BSI Bible-ah chuan hnathawktu, thutak thu fel taka hmang chu zak tur a ni lo angin, Pathian ngaiha thaa inentir turin thahnem ngai rawh tiin a dah a, mahse KJV kan en chuan ‘hmang’ tih aiah ‘then’ (divide) thiam mi tiin a dah ve thung (2Tim2:15). Chuti a nih chuan Pathian thute hi then fel ngai, rem khawm ngai tihna a ni thei awm e. Sa sattuin sa a chan a, a thet a, a awmna tur taka a dah ang hian Pathian thute hi rem khawm ngai, then fel ngai tak mai an ni.

Chutianga Pathian thute a nihna tur taka dah thiam, rem khawm thiam mi chu kan ramin a mamawh tak pakhat niin a lang bawh a ni. Pathian thuin a kawh tumna zawna a thute kan then fel thiam thin loh avangin a ngaithlatute lam pawhin kan hriat pawlh ta nuai mai thin a. Entirna pakhat atan miin rinna avanga Pathian lama thiam channa, Pathian khawngaihna tih tel miah lo a sawi lai mekin lehlamah pakhatin rinna chu thiltih tel lo chuan thi a ni a lo tih khan an thusawi a insu buai ta thin a.

Tih tel miah lo rinna avanga Pathian lama thiam channa tura Pathian felna rinna leh Pathian felna rinchhan tawh hnu/ Pathian fate kan nih tawh hnu a kan lei nuna Pathian thutiamte rap dik tura taksa zawna thiltih/ thu awihna hmanga ama lama thiam channa nen kan hriat pawlh tak thin avangin kan sawi pawlh a, Paula leh Jakoba lekhathawnte

hi an inkalh emaw tih mai turin kan chhuah thin. A sawitu lamah Pathian thute then felna a awm loh avangin a ngaithlatu lam pawhin kan ngaihfin phah ta thin a ni.

Tin, Gen15:6-ah ‘Abrama chuan Lalpa a ring a, tichuan, ani chuan chu chu a felnaah a ruat ta a’ tiin kan hmu a. He thu hi Tirhkoh Paulan la chhuakin Rom 4-ah a rawn sawi leh a, he bung leh changin a sawi tum ber chu tih theih nei tawh lo Abrahama hnena Pathian thutiam, tih tel lo rinna chungchang a ni. Paulan “Abrahama chu Pathianin ama lama thiam chang ni tura mi fela a ruat chhan chu hna a thawh vang a ni lo a, Pathian a ngaihsak vang pawh a ni lo a, amah a rin avang mai khan mi fela ruat a ni zawk e” tiin a sawi a ni. Hei hian thiltih inrawlh hma hauhva Pathian thutiam (Isaka lo lang tur, Isua entirna ni bawh) rinna avanga thiam channa lam a kawh bawh a ni.

Tichuan Paulan thiltih tel lo rinna avanga thiam channa a sawi chu mi thenkhat ten la kawiiin, kohhran ding tirah a taka thiltih lam hmu hniam a, rinna lam (thu chauh) kal vungpui an awm nia ngaiin a hunlaia zirtirna lo pelhe ta hret chu siam thain Jakoba chuan thiltih lam hawi zawngin thuchah a rawn nei ta a, a lehkathawn bung 2-naah Pathian hnathawh mihringin a tawmpuina tur lam sawiin rinna chu thiltih tel lo chuan thi a ni tiin rinna thuthlun puitute chu na takin a hau ta a ni ber mai.

Abrahama chuan Isaka a neih hma hauhvinn Pathian thutiam chu rinnain a chang a, chu chu a felnaa ruat a ni. Keini pawhin Pathian khawngaihna Isua hi kan rin chuan, amah chu kan felnaa ruat a ni dawn. Chutichuan Pathian thutiam ang ngeiin Isaka chu a lo piang ta a, nimahsela, Genesis 22 a kan hmuh angin Pathianin Abrahama rinna chu fiah a duh ta tlat mai a, Isaka chu a hmaah halral thil hlan atana hlan turin a ti a nih kha. Hemi kawngah hi chuan rinna neih ngawt kha a khingbai a, rinna chuan a thiltih nen a thawh dun a lo ngai ta a, chu rinna chuan Abrahaman thil a tih chiah khan a neih rinna chu a thiltih chuan a tifamkim ta a, tichuan Pathian thianah vuahin a awm ta tih kan hria a ni (Jak2:22). Hei hian taksaa dam chhungin rinna kan neihna zawna Pathian thuin ti tura min kohna thu awihnaa kan hlen chhuahna (kan thiltih)

hmanga Pathian thutiamte leia hmuhna tura thiam channa lam a kaww baww a ni.

Chutichuan Pathian Thlarau hruaia awm apiangte chu Pathian fate an nih thu Paulan a sawi a (Rom8:14). Hemi thuah hi chuan Johana lehkathawn 1-na bung 3 a mi “Ngai teh u, Pain min hmangaihna chu a va nasa em! Pathian faahte min vuah tak hi” tih dinhmun nen khan a inang ta lova, Faa min vuah theihna tura min hruaina ni lovin kan lei nun (rilru leh taksa) zawna Thlarau hruai ang zela awm kha fa nihna dinhmuna awm dan tur a ni a, fa nihna dinhmuna kan awm dan tur ang taka Thlarau hruaina zawma kan awmna zelah fa nihna chu leiah, rilru leh taksa zawnah kan chang chhuak (kan luah dik) dawn tihna a ni.

Chutah chuan ringtu lamin mawhphurna kan lo nei ve ta chiah a, automatic taka tan lak ngai miah lova tihtir kan ni lem lova, thu awihna/ Pathian thina/ rinnaa che chhuak thin tura koh kan ni a, phut luih erawh a ni lova, chumi tura hruai puitlin ngai kan ni zawk a, min hruai puitlin nan thil chi hrang hrang kan nunah a lo thleng ta thin a, chutah chuan nunin zirlai kan zir tihna a ni a, kan thiam nghal zung zung dawn lem lova, dai pelh leh chet pelh rum rum chang pawh kan nei thei a, mahse, chuwanga hnual mai lova thlen chin atanga hma lam pan zel tura sawm leh koh kan ni zawk a ni. Lalpan a thu malsawm che rawh se ●

BE MY VALENTINE



Upa Lalnunpuia Hrahse

VALENTINE'S DAY:

Ngaihzawng nei leh nei chiah lo pawh Feb.14 a lo hnaih hi chuan eng tin emaw kan awm ve deuh tlat zel, a chhan chu Valentine's Day zunin min phuar a ni. Valentine's day hi khawvel hmun hrang hrangah hman dan a inang lo nuk mai - Mexican chuan 'Hmangaihna leh inthian thatna ni' (Day of Love and Friendship) atan an hmang a, India ramah chuan inhmangngaihten zanriah kil dun nan leh ennawm (movie) en zanah te an hmang a, Mizoramah chuan khawi maw laia chhuah duna thil ei nan te, thilpek inpek nan leh tawngtai dun hunah te kan hmang ber a. Hmun tam berah chuan nula leh tlangval inngaizawng ten rose leh thil dang pe-in induhsakna chi hrang hrang tihlan nan an hmang thih.

Valentine's Day card hi kum 1800 lai hawl vel atanga sumdawn nana zawrh chhuah tan niin an sawi a, khawvela Valentine's Day card lian ber chu kum 2018 khan Dubai-ah siam a ni. Japan ram hi nau piang thar tlemna ram mah ni se Valentine's day hi kum khatah tum hnih an hmang lawi a, February ni 14 leh March ni 14-ah te an hmang.

Mizote pawhin he hun pui hman hi kan intihhmuh chho zel a, a tirah chuan lerh leh mipat hmeichhiat hmanna hun remchang ang lek lekin kan hmang emaw tih theih a ni, kan hmang thiam chho zel niin a lang. Tunah erawh chuan induhsakna

hrang hrang tihlan nan kan hmang thiam sawt hle. Aizawl leh khawpui dangah phei chuan mi dang nunna chhanhim nan te, thisen pek hunah te kan hmang a, tanpui ngai tanpuina hunah kan hmang thiam ta hle. Kuminah hian Valentine's day lo thleng tur hi eng tin nge hmang ila tha ang?

VALENTINE'S DAY HMAN-ANGAW:

1. Be faithful to Bethel: He hun hi Pathianin min hruai thleng a nih chuan chhungkuain emaw ngaihzawngte nen lawmthu sawi hunah hmang ila a tha ang em? Hriselna leh damna min petu, hmangaihthu ka nih theih avang leh hmangaih tur ka neih avangin

lawm nachang hriain, Pathian hnenah lawmthu sawi ila. Tin, tluang taka kan inngaihzawn theih nan leh harsatna karah pawh rinawm taka kan awm theih nan inhlan thar hunah hmang ila a va hlu dawn ve. Aizawlah chuan YRC te, Prayer Mountain te, ATC tlang te, Sakawrhmuituai tlang te bakah tawngtaina hmun tur tha tam tak a awm a; zo khaw lam tan pawh Bethel hmun remchang kan nei deuh vekin a rinawm a, Biak In kan nei theuh bawk a, Pathian mi kan nihzia leh a hruaina mamawh kan nih avangin hetiang zawng hian hun hmang ila tha kan ti em? Rinawmna tuai tharin Bethel ang u. “Biak In hawng ngeiin aw,” tia biahtu inhlan tawn nan a va tha dawn ve.

2. Dine out nge Dine in:

Chaw ei chhuaka hun han hman pawh a sual hleinem, dine out hunah pawh kan hmang thei, kum khata wawi khat hun bik hman thin a nih avangin dine out kan lo duh a nih pawhin chhungte phalna nei chuan han ei chhuak ve mah ila eng nge maw pawl le, mahse, chhuahtir chhonzawm tlaka nun erawh theihngihl lo ila. Nu leh pa hriatpuinaa inngaizawng kan nih tawh chuan dine in zawnga chaw eia insawm nan hlei hlei a chakawm ka ti. Mipa lamin hmeichhe lam chaw eiah sawm

ila, a fuh fu lo maw, chhungkuua insiam tum kan ni bawk a, dine in zawngin kumin chu kan ti duh ang em? Fuh fu lo maw? Chhungte hmuh atana kan iai erawh chu ngaihzawn loh a him fo.

3. Rose leh Krista: Hmun fianrialah emaw, inah emaw Pathian thu chhiar dun nan leh zai nan hun hmang ila, kan hlim phian lo vang maw? Miten inngaizawng thiam berah min ngai hial mai thei. IKor 13, IJn 4:7-21, Eph 5:25-33 te hi chhiar ila kan tangkaipui viau thei ang. Kan sirah Rose dah tel ngei bawk ila. Lu chung a kut nghata in tawngtaisak tawn nan hmang ila, a special viau lo maw? In tih thin pawh a ni hial tawh thei e. Fianrialah Pathian hla sain emaw ngaihlain thlifim han dawng dun heuh heuh ula a nuam awm vei. Rose leh Krista inkawp sela, hlimna a kim ber ang em?

4. Love letter inthawn ang u: Hei hi ka chak tlat pek a. Kan ngaihzawng emaw kan kawppuite hnenah Love letter ziakin inpe ila, a nuam dangdai dawn riau mai. Kan hmangaih thu te, kan phu loh thu te, kan ngaih theihzia te, Pathian samsuih nih ngei kan chak thu te, kan nuna hmun an luah lenzia te zia ngeiin han hrilh ila, lukham hnuaiah an dah tha rei viau mai thei asin. Hmangaih lehkha

thawn niah hmang ila, a nih loh pawhin inthawn tawn ila, a ri-a chhiarin inngaihthlaksak tawn ila, kei chu ka mittui a tla thei hialin ka ring a sin, a hlu dawn em mai.

5. Hun hlu bik (quality time) siam: He mi ni na na na chu kan hmangaihte pualin hun pek tum ang. Hun hlu deuh, thianghlim siin hman tum ang aw. Mi kan dah hlut hian keimahni tui kan inleih tihna a ni bawk a, mi tana kan hlut hian keimahni tan kan lo hlu a lo ni. Hun tha (quality time) insiam tum ang u. He mi ni a tih turte lo tih lawk theih a awm chuan inhmakhawsuih ila. Hun tha siam turin hmun ropui leh changkang a ngai chuang lo, man to tak taka inhmangaihna tihlan a tul hran lo, mihring leh mihring inhlut hi a hlu ber a nia.

6. Luangchhuak dun u la: Mi dang tana thil tha tih hunah hmang ila a fuh phian lo vang maw, ruihhlo ngai puih ni atan te, home hrang hrang tlawhin eirawngbawl puih ila, damdawi in leh vantlang hmunah te thil tha eng emaw ti turin inpe (volunteer) ila, hmeithai thingpui dawr siam puih nan te, hnuchham in tlawh nan te hmang dun vel ila a nuam awm; in inneih hunah in fate an fel awm bik. Tun tum chu Restaurant changkanga ei tur man to deuh deuh ei lovin mi chhumchhiate hnenah ei tur han

sem dun vel ila, chu baka high profile a awm chuang dawn em ni?

7. Thisen pe ila: Valentine's Day hi hmun tam takah chuan thisen pek ni-ah an hmang. Mipa in emaw hmeichhia zawk pawhin thisen pe ila, a bulah Rose par sen nen lo nghak ila, chhungril kan hlim dun ngawt ang a. Hetiang tih kan chin chuan nupa nih hun a lo thlen pawhin thenawm tha tak ka ni zui ngeiin a rinawm. I bial pain emaw, i bial nu-in thisen a pe ngam a nih chuan a rilru a tha hle tihna a ni ang a, a hrisel tihna a nih bakah hri tha lo a vei lo tihna a ni thei bawk ang a, a ngaihthatthlak viau bawk ang em?

VALENTINE'S DAY HMAN DAN FUH LO:

1. Expensive lo zawngin aw: Khawvel thil taka hman chiam tum hian thil hi a fuh duh lo tlangpui. Hautak deuha inhmangaih hi pumpelthum ila. Thiante leh tlang sel hlahvung emaw I.G. lamah lan mawi loh hlahvung avanga restaurant man to pui pui leh present man sang tak tak inpek kher hi tum lo ila; dawng tha bik nih duhna hian in hmangaihna kawng a tibumboh thei a nia. Expensive deuha inhmangaih aiin low budget-a inhmangaih theih hi a class a sang zawkin ka hria. Kawng kam thingpui dawr teah te, khawi

emaw lai simple deuhah te hmang ila, home velah te thla la zawk ila, kan cute reuh ngawt zawk lo vang maw? Tihmuhtu thaah intar lang ila. Thawmhaw man tlawm kan inbel a, thil man to lo kan in-present hian kan cheap a ni lo, chhungte kan nei a, kan economist a ni zawk. Kan in-come milin inhmangaih thiam zel ang u. I Present aiin Presence a hlut zawk kha aw. Heng hun hi Flex hun a ni lo, mi mithmuha lan mawi tumna hian kan rilru khalh soal ve lo se, ngaihzaungte tihrehawm lo zawnga hun hman tum ang. Mi haus a tak tak ho hi an minimalist leh riau tawh a nia, hautak lo zawngin hlimna siam tum ang u.

2. Sex hman hun a ni lo: He mi ni na na na chu hun tha a awm chuan kutte pawh kan invuan ve ang a, a rem leh chukte pawh kan inchuk ve zuks ang chu! Love sign nen thlate pawh kan la ve ang chu, inngaizawng kan nia lawm. Sex erawh chu hman hun a awm, inneih zan atan khek tlat tur a ni. Mi tam tak inchhir leh inkalsan ka hmu ve tawh a, rawngbawl na kawnga theihna tha ber chhuah ngam lo thlengin, chung mite harsatna ni fo chu a ruka sex lo hman tawh nghawng a ni duh hle. Soal hian zalen taka sex hman min kawhmuh a, a hnua soal vekin

min timualpho leh thin. Thiangaau taka sex hman duhna hian keini chu min hneh ve suh se. I pianthar loh chuan chance zawn i tum tlat thung ang. ‘Duati’ tia kan koh te hi kar lovah ‘Zawngi’ an chang leh thei tih hriain inhmangaihnaah hian ramri kham thiam la kan duh.

3. Thinrim suh aw: Valentine’s day ni hian i hmangaih nen hun inhmang dun thei lo palh mai thei, i tana hun hman chu a duh ber ang tih ring la; chumi chung a remchang lo a nih chuan a buai hle emaw a tangkai hle a ni thei. Tuan tul vang te, hna avang te, chhungte avang te, damlohna thil avang te, Kohhran thil a vang te pawhin len dun hun tha in nei lo thei. I duh ang taka thil a thlen loh tuma i awm dan hian i puitlin leh tlin loh a tilang thin tih hria la, hriat thiamna ngah mi i nih theih chuan nupui tlak/pasal tlak i ni tih a chian ni a ni hlauh thei asin. Mi Toxic lutuk, eng emaw hleka thinrim nghal mai chi hi nupui/pasal atan an tha vak lo. Beisei anga thil a thlen loh va zu in mai ching te, kutthlak duh mai chi chu kalsan a him ber; chutiang mi chu ni ve hauh suh, hun tha zawk in la nei leh mai dawn a lawm. He mi ni hi chuan inhau miah lo vang u.

4. Hmangaihna addict: Hmangaihna hi a addictive hle tih

theihngihl lo ila, a ngaih a na hle bawk. Nikum January - July thleng khan Mizoramah mahni intihlum 49 an awm a, chung zinga inawkhlum tam ber chu hmangaihna kal soal vang a ni. Zan hnih khat lek pawh hmangaihna tel lova nung thei mang lo kan awm t̄uh. Ngaihzaung inkar buai vanga buaipui ngai mi tam tak an awm mek. Samsona anga ngaihzaung buaipuia buai ral ve mai loh tur a ni. Samsona hi tunlai chuan awm ve se Samsotf-a an ti hial mai thei. Thlarau Thianghlim aw aia ngaihzaungte aw buaipuitute hi an inthen huna chaw ei thei lo, mu thei lo, awm ngaihna hre lo 'Hmangaihna Addict' a ni duh hle. Hmangaihna hi a hlu a, addict khawp erawh chuan buaipui lo ila.

SINGLE LIFE:

Mi thenkhat hian ngaihzaung neih loh hi vanduinaw emaw, luck loh vang emaw an ti thin; chungtiang thinlung pute chuan Krismas hmanpui tur te, Valentine's day hmanpui turte an zaung ngar ngar thin, an buai thei hle. Ngaihzaung nei reng tura duan kan ni kher lo, single ve zeuh zeuh tur, mi tha zaung leh hmangaihna dik zaung thlang thei turin kan single a ngai fo. Single hman lo khawpa ngaihzaung nei reng te hi an luck pawh a ni bik chiah lo, an lungawina a hniam a

ni ve thei tho a nia. A hman apiang ngaihzaung mai theih loh khawpa class hi kan awm ve a! Luck hi ngaihzaungtu ngah emaw duh zaung apiang hmin thei an ni ber chuang lo, duh tak leh tha tak neih hi luck a ni zaung mah.

Valentine's day ah hian i single a nih pawhin pawh ti suh, mi tha leh duhawm zaung zaung turin i zalen a ni zaung. Mi ten intihtheih khum che ni awm taka i bula an insawitheih emaw, thlak hrang hrang an hmuh che pawhin, 'E' ti la a zo der a ni mai. Tu thuhnuaiah mah i awm lo va, i duh duhin hun i hmang thei a, i duh duh i bem thei. Sum i save a, hun i save a, rilru i save a, HIV lakah i save a, i nunah i lal ber thei bawk sia i vannei a sin.

BE MY VALENTINE:

Inngaihzaungna hi mipa leh hmeichhe induh tawna a ni ngawt lo deuh a, nupa ni tura nun inzir tawna a ni mah zaung. Hmangaihna hi enjoyment a ni ngawt lo va adjustment a ni ve bawk. Mizoram hi India ram puma nupa inthen tamna ber a ni an ti, chuangin kan inngaihzaung dan leh kan nun hi uluk taka hman a ngai tih theihngihl lo ila. Pathian lawm tlak, mite hmuha mawi, Kristian takin Valentine's day hmang ang u aw. Isua a laia dah chungin, **'Be My Valentine - Duat' ●**

KTP ROREL INKHAWM 2025 PROGRAMME

A hmun : Chawnpui Kohhran Biak In
A hun : February 28 - 2 March, 2025

February 28, 2025 (Zirtawpni) Zan

6:30 pm – 7:00 pm : Zai ho
7:00 pm : PALAI LAWM LEH REPORT INKHAWM
Hruaitu : T. Upa Rinsailova Sailo, Treasurer
KTP Kumpuan hawn leh hlanna
Hlantu : Upa Vanlalsawma Siakeng, Synod Secretary
Reports : (1) General Secretary Report
(2) Finance Secretary Report
(3) Bial Report khaikhawmna
Zaipawl : (1) Mizoram Synod Choir
(2) Sakawrtuichhun Bial
(3) Maubawk Bial
(4) Chhingaw Veng Bial

March 1, 2025 (Inrinni)

9:30 am – 4:00 pm : ROREL INKHAWM
Hruaitu : Rev. H. Lalawmpuia, Leader

March 1, 2025 (Inrinni) Zan

6:30 pm – 7:00 pm : Zai ho
7:00 p.m. : PATHIAN BIAK INKHAWM
Hruaitu : Upa C. Malsawmtluanga, Committee Member
Thuhriltu : Rev. Dr. Rosiamliana Tochwawng
Executive Secretary, i/c KTP
Zaipawl : (1) Mizoram Synod Choir
(2) Lungdai Bial
(3) Airfield Vengthar Bial
(4) Bawngkawn Bial
8:45 pm : FELLOWSHIP
Hruaitu : Pu David Lalruatfela, Committee Member
Thusawi tawi : Pu T.C. Lalhruaitluanga, Committee Member
Special Items : (1) Male Voice - Bethlehem Venglai
(2) Short play - Durtlang Bial
(3) Fak lam - Zemabawk North
(4) Instrumental - Vaivakawn Bial

March 2, 2025 (Pathianni chawhma)

9:30 am – 10:00 am : Zai ho
10:00 am : PATHIAN BIAK INKHAWM
Hruaitu : Pu F. Lalremruata, Finance Secretary
Thuhriltu : Rev. R.C. Lalnghakliana, Synod Moderator
Zaipawl : (1) Mizoram Synod Choir
(2) Tlungvel Bial
(3) Nisapui Bial
(4) ITI Bial

March 2, 2025 (Pathianni) Chawhnu

1:00 pm – 1:30 pm : Zai ho
1:30 pm : PATHIAN BIAK INKHAWM
Hruaitu : Pu Lalrambuatsaiha, Committee Member
Thuhriltu : Pu Lalruatfela, Assistant Leader
Zaipawl : (1) Presbyterian Choir
(2) Sumsuih Bial
(3) Thingsûlthliah Bial
(4) Republic Bial

March 2, 2025 (Pathianni) Zan

6:30 pm – 7:00 pm : Zai ho
7:00 pm : PATHIAN BIAK INKHAWM
Hruaitu : Pu C. Lalkhawngaiha, Assistant Secretary
Thuhriltu : Rev. H. Lalawmpuia, Leader
Zaipawl : (1) Mizoram Synod Choir
(2) Presbyterian Choir
(3) Rawpuichhip Bial
(4) Chawnpui Kohhran
8:45 pm : FELLOWSHIP
Hruaitu : Tv. David Lalfakawma, Committee Member
Thusawi tawi : Tv. Lalrinsanga Varte, Committee Member
Special Items : (1) Female Voice - Muallungthu Bial
(2) Musical Drama - Leitan Bial
(3) Trio - Praise on 2024 Top 3
(4) Band - Bawngkawn Bethel Bial

Kumpuan pual reels insiam siak lawmman sem

NOTE :

1. Zai hruai hi a thlengtu kutah dah a ni.
2. Sound system hi a thlengtu kutah dah a ni.
3. Pathianni chawhma leh zan inkhawmah thawhlawm lak khawm a ni ang.
4. YRC pualin thawhlawm bawm hun a ni ang ●



KRISTIAN THALAI PAWL TOBUL

KTP DAY (16TH FEB) PUAL

(Source – Hniak)

KTP hi khawi hmuna din nge?:

Kohhran huang chhûng lehkhahu leh thuziak tam takah, ‘February ni 22, 1954 zana Pu Owen-a ina ðu khawma din...’ anga ziak a ni ðhin a; hei hi a dik famkim lova, ziaka hmuh theiha KTP tobul chu hetiang hi a ni.

KTP din ðan dân leh dinna hmuna ziaka hmuh tur awm chhun chu a tira General Organising Secretary NI. Zokhumi’n Kohhranhote hnêna KTP din tura a sâwmna lehkhaha a thawn chu a ni a, hei hi ziaka *document* hmuh tur awm hmasa ber awm chhun a ni. November 27, 1953-ah Teachers’ Training School, Mission Veng Aijal-ah inkoh khawm a ni a, Aijal-a mi pawimawh deuhthe leh thingtlang Middle School Staff-hote koh khawm an ni. Hei hi ziaka hmuh theih hmasa ber niin pheh hnung lamah hian a thlalak dah a ni a, hei erawh hi chu Synod hriatpui a la ni lo.

Hruaitu hmasate’n KTP din nî tak hi hriat tumin an chhui ðhin a, KTP minute bu hmuh theih hlui berah hian committee meeting an neih lo lang hmasa ber nî hi February 22, 1954 a ni a, committee ding tawh sa, rorel ni a ni a. An thurel zingah pawh Constitution thu belh tih te; Conference hunah

Branch tinin palai pahnih zel tih ni rawh se, tihte a tel nawk tawh avangin February 22 hma hian Committee pawh an lo ðu tawh a, dânthe pawh an lo siam hman tawh tih a lang a, khaw ðhenkhatah Branch-te pawh a ding nual tawh tih a hriat theih.

February 22 hi KTP din ni a ni kan tih hi hriat sual leh ngaih pawlh vang pawh a ni tho mai. Kan hruaitu hmasate hian February 22, 1954 hi KTP din ni atan i pawm mai ang u, an ti chiah pawhin a lang lo. A din ni leh kum takte hriat chian a nih loh avangin February 23–26, 1989-a Khawzawl Venglai-a General Conference an neih ðumin February 22 hi KTP day atan hman ðhin ni se, tiin an rel mai a ni. Hei hian KTP din ðan ni chu February 22, 1954 a ni tih a kawm lem lo a, amaherawhchu, KTP Day-a kan pawm tak hi a din ni anga ngaih chhunzawm a ni ta zel niin a lang. February 22 hi KTP Day-a hman hi a sualna pawh a awm

lem lo a, a pawina pawh a awm lem lo e. General Conference thurel a ni a, Synod Executive Committee-in a pawmpui a, KṚP Day atana hman mai ṭhin kha a ṭha a, chutih lai erawh chuan KṚP din ni kan chhui Chiang zel hi hmasawna pakhat a ni tho a ni.

Synod Executive Committee leh Synod Inkhawmpui thurel:

Golden Jubilee lawm laia hrulaitute'n document thar nen KṚP din ni tichiang tura SEC-a an thlen leh a hnu zela Presbytery lam atanga thu lo lūt an ngaihtuah lehnaah chuan KṚP din ni atan tuna hman lai hi a dik berin kan hria an tih tak erawh hi chu tihual palh niin a lang. A dik ber a ni lova, a dik bera hriatna chhan eng mah sawi fiah a ni lo va, document support-tu pawh a awm lem lo niin a lang. A 'dik ber' ṭawngkam tak phei hi chu hman loh a fuh ber ang. Research wing-te pawh kan nei a, hun danga hetiang thu a lo luh chānga an kuta dah ṭhin a nih anga dah ve theih mai ni si, awlsam taka pawhchah leh mai ṭhin a ni hian mi tam tak rilru a tidam zan lo niin a lang a. Chuvang chuan Presbytery agenda-ah te a lo lūt leh ta ṭhin a ni. Kum 2013 Synod Inkhawmpuiah khan agenda-ah awm lehin Synod Inkhawmpui chuan SEC kutah a dah a, SEC 150:18 leh SEC 252:10-ah te rel leh niin KṚP din tura ruahmanna hrang hrang zingah Synod Stand-

ing Committee-in a pawm ni February 16, 1954 chu a rawt a. Chu thurel chu kum 2014 Synod Inkhawmpui wawi 91-na chuan ngaihtuahin rorel General 59 Kristian Ṭhalai Pawl din kum tihchian thuah chuan 'Kum 2013 Synod Inkhawmpuiin Kristian Ṭhalai Pawl din kum chungchang lo zir Chiang tura a tih anga SEC-in an zir chianna an rawn thlen chu kan thlir a, Kristian Ṭhalai Pawl din kum chu kum 1954 February ni 16 a ni e, kan ti' tiin rel a lo ni ta a ni.

Tichuan hriat theih chinah KṚP lo din nan hian hun pawimawh tak tak ziaka hmuh theih awm ta chu :-

November 27, 1953:

Zosap Pu Owen-a hova hmalaknain Secretary hmasa ber Pi Zokhumi'n lehkha tichhuakin hemi zan hian Teachers' Training School, Mission Veng Aijal-a mi pawimawh deuhte leh thingtlang Middle School Staff-hote kal khāwmin KṚP din an rel.

February 16, 1954:

Synod Standing Committee-in KṚP din a rem ti.

February 22, 1954:

Synod Standing Committee-in KṚP din a remtih hnua Committee Meeting hmasa ber a ni.

Uluk taka ngaihtuah a nih hnua February 16, 1954 hi KṚP din hun atana pawm a ni ta a ni ●

THALAI HUANG

BIAK IN CHHUNGA INCHEI DAN TUR LEH AWM DAN MAWI KAIHRUAINA

(SOURCE: KÏP HANDBOOK)

1. Mipa tân:

(1) Pathian biak inkhâwmah mahni phâk tawka incheina kan neih thatte fel fai taka inbelin inkhawm thin ni se.

(2) Rawngbawltute, pulpit, maicham leh lectern vela hun hmangtute chuan a theih hram chuan kohhran mipui pawhin kohhran inkhâwm zahawmna kawnga awm an tihpui theih tur thawmhnaw inbel leh pheikhawk bun te hi a mawi a, kohhran mipuiten inthlahdah anga an ngaih theih tûr leh awm lo an tih anga thawmhnaw inbel loh hram a tha.

2. Hmeichhe tân:

(1) Pathian biak inkhawmah thawmhnaw thianghlim leh zahawm pângngai tak inbel hi a thain a mawi a. Kekawr hak te, kawr pan lutuk taksa lang tlang hak te, kawr awm zau lutuk leh tawt lutuk hâk te hi a mawi lo a, hâk loh a tha.

(2) Pathian biak inkhâwmah puan bih emaw, pawnfen pangngai fen emaw hi a thain a mawi a, hei hi zawm tlân ni se.

(3) Hmai hnawih (make-up) hman hian hmél a timawi a, a mawi tawh hman thiam erawh a tha.

(4) Inneih nia mo incheinaah hian a mawi leh zahawm táwk ngaihtuaha inthuan ni se.

3. Biak In chhông awm dân mawi:

Kohhranhoten Pathian biaa Biak Ina kan inkhâwm hian Biak In chhông awm dân tûr kan infuih thar reng a ngai a; chutiang atân chuan a hnuai mite hi zawm tlân tum ni se.

(1) Inkhawmnaah Bible leh (Kristian) Hla Bu ken thin tûr a ni a; thu zir tûr bik awm hunah zir laibu ken thin hi a mawi.

(2) Hla hril hi hlim lai deuh leh inkhâwmpui nikhuaah lo chuan tih loh a tha; an hril a nih pawhin tlar tin sawi chhuah vek a tûl ber lo. Solfa thlûka sakah pheh chuan hril loh a inhmeah zawk.

(3) Pathian biak inkhawmah chuan Kristian Hla Bu a mi hi sak ber tûr a ni a; a thlûkah pawh Kristian Hla Bua mi hi hman ber tûr a ni.

(4) Biak Ina luhin thut fel veleh tawngtai tûr a ni. Inkhâwm chhông chuan chhuah loh hrâm ni se; loh theih loha chhuah a tûl a nih pawhin tha taka luh leh ni se. Tûl bik thil a nih loh chuan inkhâwm bán hmain haw loh hram ni se.

(5) Biak In chhing hi kan zah tur a ni a; bula mite nêh inbiak te, thil ei te, thial leh hmuam lam chite tih loh tûr a ni a; mit rîn leh inhnawih lam chite pawh tih loh tûr a ni.

(6) Biak Ina luh dânin mobile phone hmeah hlum (switch off) emaw ri chhuak lo (silent) emawa dah thin tûr a ni a; Biak In chhôngah hman loh hrâm tûr a ni.

(7) Biak In chhôngah mobile phone camera hmanga thla lak hi insûm a tha a. Mobile phone-ah Bible emaw Kristian Hla Bu emaw kan dah a nih pawhin Pathian biak inkhawmah chuan hman loh a tha. Electronic gadgets dangte pawh Biak Inah chuan hman loh theih a tha hle ●

DAVID LALFAKAWMA
 COMMITTEE MEMBER
 CENTRAL KṬP

HUAITUTE
 Chanchin



Tv. David Lalfakawma hi Upa Lalngailova Khiangte (L) leh Lalramvuani te fa naupang ber dawttu a ni a, kum 1985, September 26 khan Shillong, Meghalaya-ah a piang a. Pianpui nauw paruk neiin a naupang ber dawttu a ni a, tunah hian Luangmualah awmin Luangmual Vengthlang Kohhranah a lawi mek a ni.

A tleirawl chhuah tirh aṭangin KṬP-ah inhmanin ri mawi lamah a tui em em a, eizawna lamah pawh Music Home Production Studio neiin a enkawl mek a ni.

Kumin 2025-ah hian Kohhranah Music Committee Vice Chairman, Kohhran Light and Sound Committee, Inrinni zan leh Pathianni Chawhnu thuhritu, Puitling Sunday School zirtirtu, Kohhran Inkhawm Zai hruaitu a ni.

KṬP-ah hian kum 2012-ah Branch Committee atan ruat a ni a, Treasurer post tih loh chu a chelh kim vek tawh a, kum 2024 khan Finance Secretary a ni. Bial KṬP-ah hian kum 2018-ah committee member atan ruat a

ni a, kum 2020-ah Bial KṬP Office Bearers atan thlan a ni a, tunah hian Bial KṬP Committee-ah Ex-Officio-in a awm mek a ni. Kum 2010-2020 (Kum 10 chhung) Bial Zaipawlah telin Bial Zaipawl Conductor a lo ni tawh bawk.

A Bible Chang ngainat ber chu Sam 37:5 “I awm dan tûr chu LALPA chungah nghat la; Amah chu ring la, aman a ti vek ang.” tih a ni.

David-a hi mi inngaitlawm leh kawm nuam tak a ni a, kum 2024 KṬP General Conference-ah khan CKṬP Committee Member atan thlan a ni. Amah be duh tan Ph. 9089529183-ah biak theih reng a ni e ●

LALRINSANGA VARTE
HRUAITUTE COMMITTEE MEMBER
Chanchin CENTRAL KṬP



Tv. Lalrinsanga Varte hi Pu Thangliana Varte leh Pi Lalhhanhimi Renthlei-te fa pahnihna ni turin Synod Hospital, Durtlangah December ni 17, 1985 khan a lo piang a, unau hmeichhia 3 a nei a ni. A nu leh pa leh a unaute nen Durtlang North-ah an chhungkuain an khawsa mek a, Mizoram Secretariat, MINECO, Khatla-ah a thawk mek a ni.


Rawngbawlna lamah chuan tunah hian KṬP, Durtlang North Branch-ah Asst. Leader a ni mek a, Leader 2024, Asst. Leader 2023, Secretary 2019-2020, Asst. Secretary 2021-2022 leh Treasurer 2018 chanvote a lo chelh tawh ṭhin a ni. Branch committee-ah kum 2009 aṭang khan a tel ṭan a ni. Tunah hian Bial KṬP-ah Asst. Leader ni mekin, Finance Secretary 2023 chanvo a lo chelh tawh bawk. Bial committee-ah hian kum 2017 aṭangin a tel ṭan a ni.

Kohhran lamah chuan kum 2011 aṭangin Sunday School zirtitu hna a thawk ṭan a, tunah hian Intermediate Department Leader ni mekin, Primary Department Leader a lo ni tawh bawk. Kumin hian Sunday School Committee, Ramthar Committee leh Building Committee member leh Kohhran

Bungraw enkawltu Committee member a ni bawk.

A Bible chang duh berte chu Daniela 12:3 *‘Hruaitu finge chu vâna êng angin an êng ang a, thil dik ti tûra mi dang hruaitute pawh chu arsi angin an êng kumkhua ang’* leh Joba 8:5-7 *‘Pathian i zawn ngat ngata, Engkimtitheia hnêna i dîl ngat ngat chuan, Thianghlim leh ngîl i nih chuan I tân bengvâr a thawh ngei ang a, Dinmun dik a pe ang che. I bul lamah tê mah la, I tâwp lamah i lian ang’* thu hi a ni a. Ahla duh berte chu KHB 292 *‘Chhandamtu Nung Rawng Ka Bâwl’* leh KHB 270 *‘Chhandamtu, chatuan nun nan’* te hi a ni.

Pathian ṭih leh mi inngaitlawm, fiamthu duh tak a ni a, amah be duh tan Ph. No. 7005671202-ah biak theih reng a ni.




HRINGLANG TLÁNG

BEIDAWN LOH

Pawlkut thla Ni 18, 1879 khân thil hmu chhuaktu (inventor) la naupang tak, Thomas Alva Edison-a chu a hnathawhna hmun (laboratory) ah hah tih hriat tak hian a ʈu a. A chauh êm êm nachhan chu thla 13 zet a thil hmuh chhuah tum, thirzai sin hmanga bur tih en (*filament*) a tumnaah a hlawhchham a ni. A buaina belhchhah tûrin sum lama ʈanpuituten ʈanpui an hreh tawh a. A theih tâwp a chhuah chung pawhin a hlawhtling thei tlat lo. A beisei êm êm vâng pawh ni lovin kal pah deuh tak hian lampblack (inʈing ang deuh) hi alkatra nêh hian a chawhpawlh a, thirzaiah hian a chulh a. Tichuan, a ʈangharh thut a, “Engati nge carbon (meihawl chi khat) a chulh, la zai ka hman chhin loh ang?” a ti leh a. Dârkâr 5 chhûng zet bûr ruak tihên an tum leh a. Mahse, hei pawh hi a hlawhtling chuang lo.

A tum a hlawhtlin theihna atan a bei ngat ngat a, la hlum lian tak pahnih zet chu a hmang zo vek a ni. A tâwpah chuan dârthlalang (glass) chhûnga thirzai dah hmanga êng siam an tum leh a, beidawn a tum lo. Ni hnih leh zan hnih mu lovin a han bei ʈa leh a. Boruak awm lohna dârthlalang chhûngah carbon-a chulh thirzai chu a dah ta a. “Current kan han tihnun (on) chuan hun rei tak hmuh kan châk êm êm mai chu kan mitin a hmu ta,” tiin a sawi a ni. Khawvêla thil hmuhchhuah zinga ropui ber pakhat Electric bulb chu a hmuchhuak ta a, khawvêl hi a tiêng ta a ni.

Heti khawpa a hlawhchham naah hian Thomas Alva Edison hi beidawng ta sela, tun thleng hian khawvel hian electric bulb kan nei lo hial awm e. Beidawwna hi sual hmanrua a ni a, tharau mi chuan beidawng lovin hma lam a pan zêl a, Pathianin mal a sâwm ʈhin. Pathian thuin; “Thing chu râwt pawh ni se, a chawr leh ang, a chawrno a tâwp lo vang tih beiseina a awm” (Job. 14:7) tih hi hre reng ila, huaisenna nen khawvel hmachhawnin beidawwna i inhnehtir ngai lo vang u ●



KANTU

N. CHHIMLUANG BRANCH

N. Chhimluang Branch hi kum 1992-ah din a ni a, Vairengte Chhimveng Pastor Biala awm a ni. Branch din tan tirh lam hian member indaih lohna avangin vawi tam tak Branch hi tihtawp thin a ni a, kum 2007-ah din that leh niin heta tang hian meimit lovin an ding chho ta zel a. Branch din hun atan pawh June ni 20, 1992 chu pawm a ni a, kum 2017 khan Silver Jubilee an lawm a ni.

Kum 2024-ah member 58 awmin mipa 35 leh hmeichhia 23 an ni a, Branch Committee hi mi 12 an ni. Kum 2024-ah Kristian Thalai chanchinbu copy 13 an la.

Thawhtanni zan inkhawm hi thuhiril, tawngtairual, paper leh kumpuan zir ho leh rilru sawina hun atante hman thin a ni. Kohhran member thi an awmin Pathianni remchang hmasa berah an inah fellowship neih thin a ni a, KTP member thi an awm chuan fellowship hunah hian ralna thu ziak an hlan thin.

Faith promise hi thla tin Pathianni hmasa berah khawn thin a ni. Kum 2024-ah group pahnihah inthenin kum tluanin group inelna siam a ni a, kum tawpah lawmman siam a ni. Branch huapa sport, hmun danga feh chhuah leh Advance Christmas te hmangin activities dangte pawh neih thin a ni baw.

Kum tin Branch pawna feh chhuah tum khat neih thin a ni a,

kum 2024-ah Golgotha Camping Centre, Vairengte tlawhin inkhawmna hun an hmanpui bakah thilpek an hlan baw.

Member Biak In hawnga inneite hnenah lawmpuina citation an hlan thin a, mo thlahna /joint reception-ah KTP-in an hruai baw thin. Member zinga lehkha zirlai, Board exam-a pass-te hnenah lawmpuina citation an hlan thin baw.

Kum tina an tih dan angin Branch hruaituten member tlawh chhuahna hun an nei thin a. Evangelical Cell pawh dinin an theih ang tawkin member hlate hnueh hnaih nan hma an la a. Kum tin project siam thin a ni a, kum 2024-ah project atan snake cable lei a ni.

Kohhran Committee-in tih tur a tuk apiangte tha takin an hlen zel thei a, Kohhranin kutke bera a neih an ni. Kohhran kutke ni tura member-te chher zel turin theihtawp an chhuah thin ●



1. Chhawmdawlna : December 13, 2024 (Zirtawpni) khan Branch hrang hrangin Synod Hospital Charity Fund puala zan khat inkhawm thawhlawm kan lak khawm ₹ 12,82,513/- chu CKṚP hruaituten Synod Hospital Director kutah an hlan. Hemi rual hian chhawmdawlna sum aṅangin Grace Home Cook hlawh tur ₹ 96,000/- hlan nghan a ni bawk.
2. Choir Cabin : January 3, 2024 (Zirtawpni) zan khan YRC Convention Centre building-a Synod Choir Cabin thar hawnna hun Synod Executive Secretary i/c KṚP Rev Dr. K Lallawmzuala'n a hmang. Cabin thar hawnna inkhawm hi CKṚP Leader Rev. Dr. Rosiamliana Tochwawngin a kaihruai a, Upa Lalmuanpuia, CKṚP GS-in report a pe a, Pu Lalruatfela, Asst. Leader leh Pu C. Hmingthanzauva, Synod Choir Director ten thu an sawi a, T. Upa Lalthlanthanga, CKṚP Committee Member-in Technical report a pe bawk. Cabin thar hawnna inkhawmah hian Synod Puipate te, CKṚP Committee Member-te leh Synod Choir -te an tel a, Chanmari Branch KṚP te'n refreshment an buatsaih a ni.
3. Charge Inhlan: January 3, 2024 (Zirtawpni) zan khan YRC Convention Centre-a Synod Choir Cabin thar hawnna hun neih zawhah CKṚP Leader charge inhlanna hun hman chhunzawm a ni a. CKṚP Leader ni lai mek Rev. Dr. Rosiamliana Tochwawng chu Synod Executive Secretary atan thlan a nih tak avangin SEC chuan CKṚP Leader thar atan Rev. H. Lalawmpuia a thlang a. Leader Charge hlan inkhawm hi Synod Moderator Rev. R.C. Lalnghakliana'n a kaihruai a. Leader thar leh Leader kal chhuakte hian thusawina hun nei ve vein Upa Vanlalsawma Siakeng, Synod Secretary-in malsawmnain inkhawm min ṅin. CKṚP Leader thar Rev. H. Lalawmpuia hi Sakawrtuichhun Pastor Bial vawngtu a ni.
4. YRC
 - (i) December 10, 2024 (Thawhlejni) khan Ramhlun North Branch KṚP-te chuan YRC Convention Centre-a Sound Mixer dahna tur lei nan ₹ 40,000 an rawn pe a, a lawmawm hle.
 - (ii) December thla chhunga Convention Centre-a hman tur donation pe te : Chair - Ngopa Br. - 2, Ramhlun Vengchung Br. - 5, Saron Veng Br. - 5 Khum chhawng - Leitan S Br. - 1, Saron Veng Br. - 1, Ramhlun E Br. - 1 Mattress - Saron Veng Br. - 1, Khawruhlian Vengthar Br. - 1
YRC hi February 28, 2025 (Zirtawpni) a hawn tura ruahman a ni a. Donation pek kawngah ṅahnem i ngai zual ang u.

CENTRAL KṚP COMMITTEE : 2024 – 2026**OFFICE BEARERS**

Leader	: Rev. H. Lalawmpuia	: 9485410859
Asst. Leader	: Pu Lalruatfela	: 9774611124
Gen. Secretary	: Upa Lalmuanpuia	: 9436142398
Asst. Secretary	: Pu C. Lalkhawngaiha	: 9774638471
Treasurer	: T. Upa Rinsailova Sailo	: 9862327187
Fin. Secretary	: Pu F. Lalremruata	: 9436362544

COMMITTEE MEMBERS

1.	Tv. P.C. Lalthanmawia	: 8014697370
2.	Pu C. Hmingthanauva	: 9436198787
3.	Upa T.C. Lalremsiama	: 9612777977
4.	Pu Rossi Lallawmawma	: 9862145940
5.	Ni. F. Lallianzuali	: 9774764394
6.	T. Upa Laltlanthanga	: 9362216851
7.	Pu Lalrambuatsaiha	: 9862325409
8.	Pu K. Vanlalremruata	: 9774636228
9.	Pu H. Zosangliana	: 9862717107
10.	Pu T.C. Lalhruaitluanga	: 8014160867
11.	Tv. David Lalfakawma	: 9089529183
12.	Tv. Lalrinsanga Varte	: 9862369807
13.	Upa C. Malsawmtluanga	: 9862366810
14.	Pu David Lalruatfela	: 9862417766
15.	Pu Nicholas Lalbiakzuala	: 7005426480
16.	Pu Lalruatpuia	: 9612307730
17.	Pu Lalduhawma Chhangte	: 8974318732
18.	Pu Rochhingpuia	: 8794210155
19.	T. Upa Lalremsiama Khiangte	: 9862311678
20.	Tv. Vanlalremliana	: 8257881767
21.	Upa Lalbiakfela	: 8414962935
22.	Ni. Agnes Lalrinzuali (Asst. Coordinator)	: 8787480280

EX-OFFICIO MEMBERS

Rev. R.C. Lalnghakliana	: Synod Moderator
Rev. Upa Vanlalsawma Siakeng	: Synod Secretary (Sr.)
Rev. Dr. Rosiamliana Tochwawng	: Executive Secretary i/c, KṚP

YRC CONVENTION CENTRE HAWN PROGRAMME

A hun	: Feb. 28, 2025 (Zirtawpni) Dar 1:00 pm
A hmun	: YRC, Falkland
Hawngtu	: Rev. R.C. Lalnghakliana, Synod Moderator
Hruaitu	: Rev. H. Lalawmpuia, Leader, CKṚP
Thupuan	: Upa Lalmuanpuia, GS, CKṚP
Thusawi	: 1. Executive Secretary, i/c, KṚP 2. CKṚP hruaitu lo ni tawhte atangin
YRC report	: Pu Nicholas Lalbiakzuala, Secretary, YRC
Zaipawl	: Mizoram Synod Choir
Solo	: Tv. Lalthlanawma, Praise On 2024 Winner
Malsawmna	: Upa Vanlalsawma Siakeng, Synod Secretary



KANTU : N. CHHIMLUANG BRANCH

KRISTIAN THALAI CHANCHINBU LA TAM BRANCH-TE

Top 10

- | | |
|------------------------|-----|
| 1. Aizawl | 805 |
| 2. Mission Vengthlang | 711 |
| 3. Mission Veng | 605 |
| 4. Venghnuai | 595 |
| 5. Republic Veng | 506 |
| 6. Champhai Vengthlang | 500 |
| 7. Electric Veng | 437 |
| 8. Venghlui | 429 |
| 9. Ramhlun North | 404 |
| 10. Chanmari | 400 |

Aizawl Pawn (Top 5)

- | | |
|------------------------|-----|
| 1. Champhai Vengthlang | 500 |
| 2. Champhai Venglai | 281 |
| 3. Siaha | 195 |
| 4. Champhai Kanan | 166 |
| 4. Keifang | 166 |
| 5. Champhai Zotlang | 160 |



KRISTIAN THALAI CHANCHINBU LAKPUITUTE



Thuampui Branch



Vangthlang Branch



Aizawl Branch



Field Veng Branch, Zemabawk North

Postal Regn. no. MZR/ 116/ 2024-2026

KRISTIAN THALAI MAN PEKNA
 Account hming : KTP
 Account No. : 30045422892
 Bank : SBI, Mission Veng Branch
 IFSC Code : SBIN0007058
*Account-a chanchinbu man petuten receipt screen
 shot whatsapp (8787480280)-ah thawn zel tur a ni.*



REV. H. LALAWMPUIA
 Leader, Central KTP

KTP DAY THUCHAH

Pathian hruainain KTP Day February 16, 2025 hian kan lo thleng leh dawn ta reng mai. Mizoram chhung leh pawna Kristian Thalai Pawl member zawng zawngte KTP Day chibai ka buk che u a. He ni thalaite tana ngaihhlutawm tak mai hi hmun hrang hrangah a lawma kan buatsaih leh ngei ka beisei. KIP Day hmangtu zawng zawngten Isua Krista rinna leh Amah anna kawnga thalaite hruai turin rilu thawnthaina nen hlum takin KTP Day i hman ang u.



Central KTP Leader Charge inhlan (3.1.2025)



Mizoram Synod Choir Cabin hawn (3.1.2025)